

PORI MA KAN DÁDASÍEN TESARONIKÁ NANIN BANTA UVAMAN AMEIN BOMPON MINO

(2 Tesaronika)

Kan Dádasí En Ma Tesaronikai Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD fifti-tu (52) fin mi uvaren mino. Esé ma uvarein bompon dan orivin maen manáa viyontá báken mi uvaren mino.

Ma vompon ma uvantein baru ino.

Koriní barurá ma mana orana ifo afápá mana un kádan biyontá ma váken mino (Aposeri 18:11 fin ná onano).

Ma vompon ma uvaman amikhein kéká ino.

Tesaroniká barurá ma monó tiyain nanin banta ino.

Nái ana vará ma vompon uvanten nafino.

Esé arái in bompon ma uváden maen mai oyampáké Pori iníkan Yisasini ma ovaránen erin nain baya ano vanasii ineine máden asuse iyaimpin mi evaránen ma vompon uváden mi maí damú ma yákó inain baya sian amá ukhen mino.

1 ¹Téi Pori má Sairasin nú Timotin nú bá anon Tesaroniká kákan barurá ma mumunan nanin banta váke setin Tifóe Tiyarafenu vá Bafan Yisas Karaisini kékasí ma ukhaonafin mi ma vompon uvaman amé

uno. ² Tifóe Tiya rafenun má Bafan Yisas Kara isin má pinté ma eriyain tarisari vá ará kusin má ano vá tiretin má bano.

Porini Susu Siantan Má Amúkin Má Baya Ino

³ Mumunan tiyofi sifá tiváeyan noe, funtákein avúavá baréi siretin nan Tiya rafenu susu sianté iyá uno. Mai fara vara seyo, siretí ankani mumunan mano mo ákonaen kákani iyákayan ben moéken ará amin maran iya ono. ⁴ Ara ara uman bariyáke ma mai uman kayo van ída ininto ma ákona e mumunan iya ma yorarí iyaona van mi minó akhempá ma Tiya rafenurá mumunan iyain kékápin ma orivé maé tiretí ankan nan amo sé iyá uno.

Bafan Yisasi Ma Erin Nain Damú Ma Banasii Avúavá Daimin Nain Baya Ino

⁵ Máan tiyá umpo mai ma variyaona uman manon aníen mi Tiya rafenu ano funtáden daimiyan pasen mi siretin e avían bei yafisimpin kainten mino. ⁶ Tiretin ma uman amiyain anonafá Tiya rafenu ano vetin daíden uman aminten mino. ⁷ Máan tinten mifo setisi Bafan Yisasi ma vei ákona enisori kayo vá ma inaru fáké ira anamuná bá ma erin nain damúi mai ma uman bariyá ótífanuna kéká tivíkan timinten mino. ⁸ Mai ma erin nain damúi Tiya rafenun ma ída afová en ma inká Bafan Yisasini kama vaya ma oyan amiyáin nain kéká uman aminten mino. ⁹ Baya ma ída iniyáin nain nanin banta ano ída kípan namu uron ukhein uman mamaren Bafan má beni kakhakhein ákona vái ádé ída vanten mino. ¹⁰ Bei ma ovaránen erin nain damúi mai yanasinta afoká inten mino. Máan ma intin maen kantasí ukháin nain nanin banta ano véin amo siyan aví daní iyantiya siretin má deren maifin ban nono. Mai fara vara seyo, seti ma ontaré ma siameruna vayarái mumunan ukhare ono.

Pori Ma Amúkein Baya Ino

¹¹ Máan tukhein nan mi siretí ankan Tiya rafenu ano sesi funtákein nanin banta e siren béi ma araren avíká einíen bei ákonafó tiretí ankani kama ineine vá kama avúavá bá ma mumunan mano afoká uádiyain kanaí ino van mi ena ena simúkuan béin amiyá uno. ¹² Minó nanin banta ano siretí kama avúava san Bafan aví daní intin maen inká béi ano siretin aví daní ino van mi simúkíyá uno. Tetisi Tiya rafenu vá Bafan Yisas Kara isin má sarisari ano siretin má báken mai yanasinta maman dákó inten mino.

Bafani Erin Ádé Iyantín Ma Aní Daná Dakó Inain Baya Ino

2 ¹ Mumunan tiyofi sifá tiváeyan noe, setisi Bafan Yisas Kara isi ma erintí ma ven má manafin bá tífanuna vaya siaméku inin nono.

^a 1:2 Rom 1:7 ^b 1:4 2Ko 7:4; 1Te 2:19 ^c 1:6 Rom 12:19 ^d 1:7 1Te 3:13 ^e 1:8 Ais 66:15
^f 1:9 Ais 2:10 ^g 1:10 Kor 3:4 ^h 1:11 Kor 1:9; 1Te 1:2-3

²Manáa vanta ano ma oriven Bafani yamú inka erikhen mino ma sin nain baya van ída vá anú duman duman ono. Máa siren ma setí ankan nan mai vompon uvamádan erikhen mino sen ma inká sakhanampa vaya sen ma intiya mai vaya ída vá ineno. ³ⁱMáan ma sin nain baya kayo ano ída vá tiretin kufa uádano. Mai fara vara seyo, Yisasi ma ída erikhantin maen kokhon nanin banta ano Tiyaarafenu vá aruviyantín maen mai ma man baya ma átakharé iyáin nain banta maman dákó inten mino. Mai vantan Tiyaarafenu ano kákan uman aminten mino. ⁴^jMai vanta ano ve aví daní uren maen Tiyaarafenu ma araren monó tiyain oyampá baya siren beni kákan monó namumpin un kumamen téi Tiyaarafenu umpo sen tiví daní ono sinten mino.

⁵Téi ma siretí ankan má báké maé mai vaya fefa suron mi siamikhá umpo ídá ovare me iniya rafono. ⁶Intéa yaná anó béin pákaran ná baren nafi mai saréa inka afová iya ono. Mai fara vara seyo, veni yamú ma erintin mi yákó inten mino.

⁷Man baya ma átakharéin ákona ano aúpá báken pefái yoriyái fura sé tiamiyá uno. Máan tukhen mifo mai ma iyáká inain banta ma yo avían kaúðantin mi mai yaná dákó inten mino. ⁸^kMai ma man baya átakharé iyá inain banta ano ma e unen afoká édavuvintin mi ínaimpáké ma Bafan Yisasi erinten mino. Eriven maen bei ákona vayafó mai vanta maman barasí uren khakhan ákona fókéi mai vantai ákona yo varanten mino. ⁹^lMan baya ma átakharéin banta ma erin nain mai Ban Anoni ákona fói yoriyan mino. Máan tiyan pasen enará ukhein avúavá bá inká aní daná bá maman afoká inten mifo mai kampun danasinta ino. ¹⁰Tiyaarafenui aran nanápin ma vain nanin banta kayo mai vanta ano ara ara mákasimpó betin máden kufa uádante mino. Mai fara vara seyo, fura vaya ano vetin ayaintin mumunan ino van iyan mifo mai van beti ída anunu ukhen mino. ¹¹Máan tukhantin pasen Tiyaarafenu ano ákona mákasin tiantantin mai kéká mákádantin mai kampun bayará pura ino sinten mino. ¹²Máan tintin maen mai ma Tiyaarafenui fura yanáká ma ída mumunan inton ma namu avúava san ma anunu ukharéin nain kékái Tiyaarafenu ano ínaimpá daíden uman aminten mino.

Mumunan Nanin Banta Ano Ma Mantaan Ákona In Baya Ino

¹³^mMáan tukhein nan mi mumunan tiyofi sifá tiváeyan noe, Bafan mano ma anunu uren avábá uantiyain monó nanin banta van mi ena ena yamú Tiyaarafenu vaipá tusu siantiyá tiféuno. Mai fara vara seyo, setin ma evaránen tivíkein daná afová ino siren mi esé arafintá Tiyaarafenu ano siretin aní ukharé in mi Kantá Aunani funtákein doran mano sireti

ⁱ 2:3 1Ti 4:1; 1Yn 2:18; 4:3 ^j 2:4 Isi 28:2; Dan 11:36 ^k 2:8 Ais 11:4; Rev 19:15 ^l 2:9 Rev 13:11-13 ^m 2:13 Efe 1:4; 2Te 1:3

maman avusese en mino. Máan turen mi mai ma fura yanáká mumunan iyaonarái evaránen aviren mino. ¹⁴Mai kama vaya ma siamé tiferunarái setisi Bafan Yisas Karaisini kakhan aúpin bano van búi siretin arakhen mino.

¹⁵Máan tukhein nará mumunan tiyofi sifá tiváeyan noe, mai ma vompon po safi áa soo fo safi ma siamiyáké afova ameruna vaya vá pákaan ákona uveya mairasá mantano.

¹⁶Tetisi Bafan Yisas Karaisin má Tifóe Ti yarafenu vá ano setin tivábá uren mi vei sarisari fóké para van oriyan ban ará ákona vá inká kamaen báken ma avein avúavá bá timen mino. ¹⁷Búi ano vá tiretin ma minó kama avúavá bariyaona vá inká kama vaya kayo ma siyaonafin masá ákona uantano.

Porin Amúkuantano Van Ma Inaúkein Baya Ino

3 ¹Mumunan tiyofi sifá tiváeyan noe, ma sípá bayan té uno. Mai ma Bafani kama vaya ma siretí ankan inire ma mai aránaópá baona vaya minó akhempá tiamé orera ékun banasí ano iniren mai vaya aránaópá bano van mumpo vá amúkusintano. ²Amúkesin ná namu vanta kayo ano ma setin uman timiyain pinte vá Ti yarafenu ano siya ino. Mai fara vara seyo, minó ano ída Bafantá mumuman ukhen mino. ³Máan tukhen mifo Bafan mano ma sirein baya ánain pura sen bákuriyain mi vantin tiretin ákona amiren daffkantín Ban Anon mano siretin ída uman aminten mino. ⁴"Mai ma siretin nan barano van ma siamé tiferuna yanasinta kama e variyan nan Bafan mano setin ineine simí afová ukheruna ínaimpá deren mai avúavá pákaresin banten mino. ⁵Áesin ná Bafan mano siretin ayainti vá Ti yarafenu ano ma vanasí avábá iyain má inká Yisas Karaisi ma mantaan ákona uven uman barein má afová ure vá mai ma einí ono.

Ída Ma Avesara In Baya Ino

⁶"Mumunan tiyofi sifá tiváe oe, setisi Bafan Yisas Karaisin avíkái ma man baya siamé uno. Mai ma siamikhé tiferuna vaya ánain ma ída yakhafiyán ma avesaraen noin kéká áde ída vá orono. ⁷"Mai fara vara seyo, siretin má ma váké maé tetí ankan ída sivesara iyákuya fefái afová ukha ompo setinti sivútivá ánain mana vá bákurono. ⁸"Ída mana yunan para variyá umpo miyaní uré anan bariyá uno. Máan tiyái siretin ída uman ameno van pasé inuran má baya má ákona yorará uré mai yanasinta variyá uno. ⁹"Tetí ankan kasaé dunan inantiré nanunaren mifo mai avúavá ódareya mai ánain bákurono van mi siretin aní é uno. ¹⁰Para

ⁿ 3:4 2Ko 7:16; Kar 5:10 ^o 3:6 Rom 16:17 ^p 3:7 Fir 3:17 ^q 3:8 1Te 2:9 ^r 3:9 1Ko 9:4; 1Te 1:6

vara seyo, siretí ankan má ma váké maé ma man bayan tiamikhá uno.
 “Mana vanta ano ma avesara uren ída yoranten maen mai vanta ano ída
 vá dunan nano.”

¹¹ ^sMáa sé tiamikharéi inékun tiretin aúbanté manáa ano avesaraen
 nóken ena kékái yoran aa iyáden avesera amiyan ne sen me sisimí iniyá
 tiféuno. ¹² ^tMáa sé iniréi Bafan Yisas Karaisin avíká máan nanin banta
 van manará báken dunan dóden nano van mi ma man baya siamiyá uno.
¹³ ^uMáan tiyantiya mumunan tiyofi sifá tiváeyan noe, puntákein avúavasí
 in nan ída vá avesara ono.

¹⁴ Ma vompompin ma siamé tiferuna vaya ánain ma ída yakhafin nain
 nanin banta vá ída o munesin ná betíi avúava san ayave van ino. ¹⁵ ^vÍda
 vá bérin namuro an de vá afá aváen ma man baya siameinisá ono.

Porini Amusin Baya Ino

¹⁶ Ara ara uman mano siretin amaniná erinten mifo áesin ná ará kusin
 benafo Bafan mano ena ena ará kusin amiren ná tiretin má bano.

¹⁷ Téi Pori anon te siyampókéi ma kípán baya uvádéi sesi aní daná
 mairá kaé uno. Minó bompon kayorá máan manan ukhé uno.

¹⁸ Tetisi Bafan Yisas Karaisini sarisari ano siretin má banti vá bano.